


Jou belewenis

Deel die doendinge in jou gunstelingdorp met Beleef-lesers. Stuur 'n e-pos na alet@media24.com.



Die uitsig op die Hottentots-Holland-bergreeks op Vergelegen. Hier kan jy piekniek hou onder die bome.

| FOTO: LIANI JANSEN VAN RENSBURG

Wyn, olywe en tuine

Somerset-Wes, knus teen die berge, is 'n regte kaalvoetdorp met karakter

Liani Jansen
van Rensburg



Op my dorp

'Hulle sê die son gaan skyn daar op Somerset-Wes." So sing die Afrikaanse rockgroep Spoegwolf altyd oor die liefde vir 'n meisie wat op die einste dorp woon. Met die Helderberg en die Hottentots-Holland-berge wat dié Wes-Kaapse dorp omring, is dit geen wonder dat mense dikwels hul hart op Somerset-Wes verloor nie. Dis 'n kaalvoetdorp, 'n dorp met karakter en wat vele stories kan vertel. Besoek die natuurreservaat, wandel in die tuine van Vergelegen en klink 'n glasie op die stoep van Lourensford. Hier is vier goed wat jy beslis moet ervaar op Somerset-Wes:


1 Vergelegen

Dié wynplaas, wat in die 1700's deur Willem Adriaan van der Stel begin is, is beslis 'n uitstappie werd. Jy kan teen R30 ses van die wyne proe, of smul aan die heerlikste kosse by die Stables- en Camphors-restaurant, piekniek hou op die grasperke en deur die eeue oue tuine wandel.

Moenie haastig wees as jy die plaas besoek nie, maak tyd om die geskiedenis en die skoonheid in te neem. Toegang tot die plaas kos R10 vir volwassenes en R5 vir pensioentrekkers en studente. Stables is daaglik van 09:30 tot 17:00 oop. Maak seker jy bespreek by 021 847 2156. By Camphors kan jy Woensdag tot Sondag middagete eet en op Vrydag en Saterdag ook aandete.

2 Morgenster

Hierdie plaas, wat bekend is om sy bekroonde wyne en olyfolie, is in 1711 gevestig. Hier kan besoekers smul aan Morgenster se olywe, olyfolie en wyne. Nie net sal jy iets oor die proses leer nie, maar ook sonder twyfel met 'n bottel olyfolie of selfs twee huis toe gaan. Dit kos R30 om die olyfprodukte te



Die geur van varsgemaalde koffie sal jou oorval sodra jy verby The Coffee Roasting Company op Lourensford loop.



Jy kan heerlike olywe en wyn proe op Morgenster.

proe en R35 vir die wynproe. Die plaas is elke dag van die jaar, behalwe Goeie Vrydag en Kersdag, van 10:00 tot 17:00 oop. Skakel 021 852 1738 vir meer.

3 Lourensford

Dié plaas, wat eens deel was van Van der Stel se Vergelegen, het vele aktiwiteite vir besoekers. Jy kan varsgemaalde koffie van oor die wêreld heen by The Coffee Roasting Company proe en selfs koffiebone koop. Of geniet 'n maaltyd by The Millhouse Kitchen.

As jy 'n heerlike Sondag wil hê, kan jy gerus die mark tussen 10:00 en 15:00 besoek. Hier verkoop hulle onder meer vars brood, biltong, roomys en selfs Banting-vriendelike kaaskoek.

'n Wynproe op dié plaas is ook 'n besonderse ervaring. Teen R55 kan jy die

Doendinge



wyne kombineer met sjokolade of Turkse lekkers. 'n Gewone proessesie kos R30. Jy kan daaglik tussen 09:00 en 17:00 wyn en koffie proe. Die restaurant is van Dinsdag tot Saterdag van vroeg tot laat oop en sluit op 'n Sondag reeds om 17:00. Skakel 021 847 0030 om 'n tafel te bespreek, want die kos is gewild.

4 Helderberg-natuurreservaat

Kom hou piekniek onder die bome, wandel op die staproetes of gaan klim die Helderberg uit. Hier is beslis iets vir die hele familie om te doen. Jy betaal R10 per voertuig en dan R20 vir elke volwassene en R10 vir kinders, studente en pensioentrekkers.

Besoektye wissel van seisoen tot seisoen. Desember tot Februarie: 07:30 tot 20:00; Maart en November: 07:30 tot 19:00; April tot Oktober: 07:30 tot 17:30.